





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.544





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.544





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.544



Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.544









1  
6  
564

D. O. M. S.  
PAULI NEUCRANTZJ,  
ROSTOCHIENSIS,  
PHIL: ET MED: D.  
IDEA PERFECTI MEDICI

Oratione funebri proposita,  
Cum Maximo Reipubl: Lubec: & Clar:<sup>mo</sup> nostri  
seculi Medico,  
DN. JOANNI HENRICO  
MEIBOMIO,

*In Auditorio Lubecensi publicè parentaret.*

Ad Ampl:<sup>um</sup> Magistratum Lubecensem.



LUBECÆ, Literis Gothofredi Jægeri,  
ANNO M. DC. LV.

063



Σὺν Θεῷ.

PAULUS NEUCRANTZIUS,  
ROSTOCHIENSIS,  
PHIL: ET MED: D.

Lectori Benevolo S.



*Septem elapsa septimana, cum frequenti comi-  
tatu, non sine publico marore, Reipublicæ nostræ illud  
singulare ornamentum, JOANNEM MEIBOMIUM, Ar-  
chiatrum Lubecensem Clarissimum, terræ manda-  
vimus; ipsis exequias euntibus Musis: quod humaniores  
literæ, omnesq; bonæ artes, ut de T. Aristone olim ve-  
rebatur Plinius, in uno homine summum discrimen  
adire viderentur.*

*Si enim exquisitas animi & summas dotes, quas  
ne in millesimo quidem doctorum hominum pares re-  
periemus, siue studia literarum cum lacte materno  
hausta, posteaq; summâ cum intentione tractata, siue  
divini ingenii labores literis consignatos; præterea  
egregias virtutes, quæ animum ejus exornarunt, præ-  
clara item merita, quibus tot annos cujusq; nostrum  
valetudinis curiosus ciues nostros, aliosq; qualis-  
cunq; conditionis sibi devinxit, ad rigidam judicii lan-  
cem examina verimus, quis non, nisi extremi ingenii  
aut*



aut perfrictæ planè frontis casum hunc mortalitatis &  
literis, & Reipublicæ, acerbum, omnibus certe bonis lu-  
gubrem, fuisse, fatebitur, & tam nobile depositum, ex-  
tincto tanto doctrinarum lumine, terræ mandatum  
justo dolore queretur?

Equidem ille expletâ mortalitate, cælo redditus,  
eterno jam fruitur gaudio, atq; immotus cunctis, ut  
alia in re canit Claudianus,

Casibus ex altâ mortalia despicit arce,  
& incluti sui nominis famâ fruitur apud posteros;  
quam nulla temporis injuria unquam oblitterabit, aut  
ἀχαρίστητα cuius cuius inhumani ac feri imminuet & de-  
lebit: nostrum tamen omnium fuerit memoriam exi-  
mii viri grato animo versare, & quæcunq; oblatâ oc-  
casione significationem amoris dare; de quo vere mihi  
dicere liceat ex Boethio:

Ἀνδρὸς ἱεροῦ σώμα διδάμεις οἰκοδομοῦσι,  
Sacri hominis corpus virtutes ædificarunt,  
nisi si vetera solum extollimus, recentium incuriosi.

Cum primis verò mihi allaborandum duco, ne  
quem hæreditaria, atq; ab utroq; parente transcripta  
ac intima familiaritas studiorumq; similitudo ipsi con-  
iunctissimum fecerat, primus in leges amicitie peccasse,  
& novissimo ac lugubri parentationis officio defuisse,  
deferri queam; quamvis in magni atq; excellentis viri

A 2

gloriâ

2



gloriâ asserendâ aut propagandâ, prodendisq; laudibus impare plane me noverim, nec MEIBOMIUM, nisi à MEIBOMIO, dignè laudari posse censeam.

Craftino igitur mane, horâ nonâ; quæ inter ordinarias occupationes, aliq; multa avocamenta, super memoriâ Incluti Viri à me meditata tenui oratione complexus proponam: quod & ipsi MEIBOMIO, si superaret, aut aliquis mortalitatis sensus ipsum tangat, (cum, auctore C. Tacito, sapientibus cupido gloriæ novissima exuatur,) non ingratum fore credam; si virtutum suarum maxime conscius, ut qui cum eo familiarissimè atq; amantissimè vixerim, supremum hoc ac triste ministerium sim præstiturus. Quæ res ut piè defuncto honori, & Reipublicæ Lubecensi, quæ tanti nominis virum viginti sex annos liberaliter habuit, gloriæ, vertat, mihi vero feliciter succedat, Ampl.<sup>mum</sup> & Laudat.<sup>mum</sup> Magistratum, Clar.<sup>mos</sup> cujuscunq; professionis Doctores, Reverendos verbi Divini Ministros, Ornat.<sup>mum</sup> & literarum intelligentes Cives, Studiosos juvenes, omnes omnium ordinum literatos, ut paulo ante nonam in templo Cathariniano frequentes adesse, & ex defuncti annalibus vitam ejus ac res præclare editas enarrantem benignè audire velint, officiosè & peramanter rogo. P. P. Lubeca Anno clc Idc. LV. IX. Julii.

Qui





Quia cælum tuentur, *A. Incluti*, & in augu-  
tissimo rerum naturæ amphitheatro admirandam  
æterni atq; immensi operis structuram, for-  
nices spaciosissimos, nullis libramentis suspen-  
sos; præterea alta illa decora, fulgentia sidera, eo-  
rumq; naturam, positus atq; affectiones oculis ani-  
moq; contemplantur, rem in tota consideratione  
mundi maximè miram atq; ostento similem, Cla-  
rissimum scilicet *Lunæ* jubar, quotiens terra, inter  
hanc *Solem*q; media facta, umbrâ suâ radios *Solares*  
interceperit, occultari testantur.

Viros egregios, virtute rerumq; gestarum fa-  
mâ ac literis clarissimos, qui fulgore suarum virtu-  
tum universum orbem occupant, ut merito astris  
comparare licebit, non minùs, quàm magistrum  
suum *Epicurum* ipsi *Soli* *Lucretius*: (quos etiam in  
futurâ illâ vitâ, si fidem cæteraq; pietatis documenta  
non exuerint, stellarum instar radiaturos *Sacræ*  
*Scripturæ* monumentis relatum; ) ita, si fato suo eos  
defungi, ac naturæ debitum persolvere, terræq;  
omnium benignæ matris sinu recipi contingat, tri-

A

3

stem

3



stem virtutum atq; scientiarum eclipsin succedere,  
videbimus, atq; obumbrari inlustrem locorum cla-  
ritudinem, quæ tantis luminibus intra viscera terræ  
absconsis orbata, obscuram caliginem densasq; te-  
nebras experiuntur.

Sensit hoc magno malo suo *Lubeca* in excessu  
summi & singularis Viri, JOANNIS HENRICI MEIBO-  
MII, *Archiatři Lubecensis* incomparabilis, de nostra  
Republica literisq; communibus præclarissimè me-  
riti, cujus corporis exuvias, frequenti in exequiis  
*Laudatissimo Magistratu*, non sine publico litera-  
torum omniumq; bonorum luctu ante 7.  
septimanas funerandas deduximus. De quo con-  
fidenter affirmare ausim, illum omni exemplo ele-  
gantioris literaturæ emendatiorem fuisse, & (ut per-  
fectâ sapientiâ virum Princeps eloquentiæ *Romanæ*  
vidit neminem & virum absolute bonum, *Phænici*  
similem dixit *Seneca*, qui quingentesimo anno se-  
mel nascatur, ) medicum omnibus numeris absolu-  
tum aut dari neminem, aut hunc omne punctum  
laudis tulisse.

Equidem immortalis gloriæ fama piè defun-  
ctum æternùm comitabitur, & si quis locus apud  
seram ac gratam posteritarem, aut honos studiis erit,  
nulla oblivio magni hujus viri memoriam delebit;  
jactura



jactura tamen, quam civitas nostra experta, non tra-  
latitia est; quod inclutam illam gloriam magnam  
partem ad se pertinere videat, quæ tot annos eum  
benignè & liberaliter complexa fovit; nunc tanto  
hospite ac cive sit cassa, & sollicita publicæ incolumi-  
tatis, in hoc uno civium suorum valetudinem  
laborare vereatur; ut qui exasciatis & saluberrimis  
ejus consiliis frui amplius non possint, quod S.P.Q.  
*Abderitanus de Democrito* prudenter censebat.

Mæstissima quoq; vidua & suavissimi liberi &  
& generi quantum & quàm animo conceperint  
dolorem maximum, luctuosus eorum vultus, & tan-  
tum non mærore contabescens, satis ostendit, &  
cuivis conjicere in proclivi est: cum tanti nominis  
maritum, patrem & socerum perdidierint, cujus  
opera & consilio nullo non tempore commodissi-  
mè illis utilicebat, nunc cuncta prope decollasse vi-  
dent: ut plenum humanitatis ac pietatis officium  
mihi præstiturus videatur, si quis publico damno  
& privato mærore condolere, & raras MEIBOMII vir-  
tutes, quibus eum divina benignitas vivum macta-  
vit, publico elogio celebrare velit; si forsan deside-  
ria eorum aliquo modo solari queat. Cum alias  
recepto tot seculorum more cani ac memorari for-  
tia facta magnorum virorum, quæ vivi fortes edi-  
dere,

4



dere, etiam apud barbaras gentes usu confirmatum  
sciam; nec quid sanctius habeat reverentia supersti-  
tum, quàm ut amissos venerabiliter recordetur. An  
quia unà cum corporibus non extinguuntur ma-  
gnorum virorum animæ, atq; ut creditum fuit,

— *generosam venit ad umbram*

*Mortis honos?*

Quod si *Silii Italici* autoritas æstimanda nobis erit,

*Dulce etiam venit ad manes, cum gloria vitæ*

*Durat apud superos, nec edunt oblivia laudem.*

Unde mortuis tam religioſa jura tributa, & quorum  
omnis vita consumpta in laboribus gloriosis, eo-  
rum posteritati datum, ut quomodo exequiis à pro-  
miscuâ sepulturâ separantur; ita in traditione supre-  
morum accipiant habeantq; propriam memori-  
am: quæ & posterorum ingenia excitare, & ad quæ-  
vis laudum imitamenta & facinora exemplō ma-  
jorum fortiter patranda invitare solet.

Laudari quidem à laudato viro gaudebat *Na-  
vianus* ille *Hector*, & felicem censebat *Achillem*  
*Alexander*, à rerum gestarū claritate *Magni* cogno-  
men meritis, quod laudum suarum præconem  
*Homerum* nactus esset: qui etiam propterea edicto  
cavit, ne quis ipsum præter *Apellem* pingeret: qui &  
à *Pyrgotele* solo sculpi, nec ab alio, quàm *Lysippo* ex  
ære



ere duci, volebat. At si meo me pede metior, ingenuè  
profiteor, nec tantum in me ingenii esse, nec questu-  
bus ægrorum exercitum, ac dudum à bonis literis  
absentem, dignum quid tanto Reipublicæ literariæ  
Heroe, operâ præsertim subcisivâ, commentari po-  
tuisse: cum arduum esse sciam in tantâ varietate judi-  
ciorum in dicendo servare temperamentum: quòd,  
si parcè decora laudum attingam, liventi, si profusius  
merita commendem, obnoxio aut adulanti similis  
videri possim.

Mutuus tamen, & qui inter vivos erat, tenerri-  
mus amor, tum plurimorum beneficiorū cumulus  
in me congestus imperavit mihi, ut triste atq; acer-  
bum munus in me susciperem, & præsentī, quam-  
vis soloci filò ductâ oratione vitam laudesq; necessa-  
rii mei persequerem: quod vitio mihi dari non posse  
credam, si vel occupatissimus, ac parum disertus,  
certe minimè eloquens dicendi partes mihi vendi-  
caverim; quod summa familiaritas eorundemq;  
studiorū professio, si non marmore, auro, solidove  
metallo, MEIBOMIUM penitus exprimere, at saltem  
levi penicillo tenuiq; oratiuncula adumbrare queat,  
& ne, extincto beneficiorum authore, intercidisse  
simul apud me meritorum gratiam quis suspicetur.

B

Adeste



Adeste quæso *A. Incluti*, animis auribusq; præ-  
sentibus, & qui vivum MEIBOMIUM impendiò ama-  
stis, defuncto jam mortalitatis casu novissimum ho-  
norem concedite, mihi singularem gratiam, & in-  
gentis Viri virtutes vitamq; actam enarrantem citra  
fastidium aut præjudicium benignè auscultate.

Natum recens infantem MEIBOMIUM Anno  
millesimo quingentesimo nonagesimo, 27. *Augusti*,  
blando vultu ac molli sinu excepit fovitq;

*Julias*, in totò notissima *Julias orbe*:  
ut ad natalitia Inlustris Viri consecranda ipsa loci  
ratio conspirasse videatur: quæ sæpe non parva invi-  
tamenta ad virtutem præstat; ut contra ær crassus,  
densus, nebulosus, aciem ingenii obtundere atq;  
hebetare solet: unde & *Bæotia* olim malè audiit, &  
auris *Batava* eandē ob rem *Martiali* infamis: quam  
vis experientiæ documentis constet, si studium, si  
cultura felici ingenii accesserit,

*Magnos posse viros, & magna exempla datu-  
ros,  
Vervæcum in patriâ crassoq; sub ære nasci,*  
ut de maximo sui seculi Philosopho, *Democrito*,  
Poetâ refert, quem *Thracem*, *Bionem Borysthenitem*,  
*Zamolxin Getam* fuisse historiæ prodiderunt.

Illud



præ-  
ma-  
ho-  
& in-  
citra  
Anno  
gusti,  
loci  
invi-  
assus,  
atq;  
t, &  
iam  
si  
os,  
b,  
b,  
d

Illud ut compertum, & summi Præceptoris  
testimonio comprobatum, referre placet, tempera-  
menta moresq; hominum alia montosis, silvosis, &  
aquâ carentibus, alia palustribus & aquosis, alia pla-  
nis, suis quæq; locis ingenia, conformari: unde idem  
*Asiaticos molles, effœminatos, laborum impatien-  
tes, contra Europæos audaces, strenuos, laborum  
tolerantissimos dixit:*

———— Certè populi, quos despicit Arctos,  
Felices errore suo, quos ille timorum  
Maximus haud urget lethi metus: inde ruendi  
In ferrum mens prona viris, animæq; capaces  
Mortis, Et ignavum est reditura parcere vitæ.

Parentes habuit noster eximios, ut ex ipsius sapi-  
entiæ stirpe generatus videatur: Patrem HENRICUM  
MEIBOMIUM, quadraginta duos annos Professo-  
rem in *Academiâ Juliâ* longè latèq; clarissimum,  
Historicum, Poetam & Philologum in paucis hoc  
ævo comparandum: Matrem *Sophiam Bökeliâ*,  
*Davidis Bökeli*, Medici & Protochirurgi *Divi Julii*,  
*Ducis Brunsvicensis* filiam, fœminam lectissimam.  
Avum MARTINUM MEIBOMIUM, scholæ *Lemgovia-  
næ* primùm per sexennium Rectorem, deinde  
*Alverdissensem* in comitatu *Lippiaco* Pastorem:  
Aviam *Annam Dreieram*, filiam Doctoris *Johannis*

B 2

Dreieri

6



*Dreieri*, Theologi suo tempore eximii, qui bonam partem Ecclesiarum *Westphalicarum* à Pontificio fermento liberavit, primum *Hervordiae* Superintendens, postmodò *Minda*, ubi & vivendi finem fecit. De quo ut memorandum hoc loco referre placet, patrem ejus, Senatorem *Lemgoviensem* spectabilem, ad annum ætatis supra centesimum vigesimum pervenisse, & fratres duos sacris initiatos fuisse, *Franciscum*, SS. Theologie Licentiatum & *Hermannum* Theologie & Decretorum Doctorem, per *Saxoniam*, *Thuringiam* & *Westphaliam*, ut vocant, Provincialem, Virum magnum & doctum, & *Chronicis Oldenburgensibus* atq; inter inlustres *Westphaliae* viros celebratum.

His Clarissimis majoribus ortus noster literarum scientiam quasi hæreditario jure aut testamento transcriptam accepisse dici poterat: certè, scintillulas divinæ mentis simul traductas nemo inficiabitur, quibus excitatus indefesso studio sibi veram gloriam paraverit. Gloria quidem parentum natis præclarus est magnificusq; thesaurus; ita tamen, ut indecorum existimet *Plato*, non ob propriam virtutem, sed ob merita famamq; parentum honorari: adeo

———— miserum est alienæ incumbere famæ:

Non



Non tamen quis humili loco natus præreptam  
sibi ad virtutes & honores occasionem existimet:  
subsilire enim, authore *Seneca*, in cælum ex angulo  
licebit. *Socrates* *Sophronisco* patre, lapidario, matre  
*Phanaretâ* natus, *Bion Borysthenites*, ignobili loco  
ortus. *Theophrastus Eresius* fullonis erat filius: qui ta-  
men omnes famam nominis immortalitati conse-  
crarunt. Sæpe etiam pessimorum parentum liberi  
detersâ per virtutes ignominia maculâ eluctati  
fuere. *Sisyphi*, *Antolyci* & *Phlegya* posterî gloriâ  
& virtute inter magnos Reges floruere. *Pericles*  
*Athenis* natus è sceleratâ familiâ, *Pompejus Magnus*  
patrem *Strabonem* habuit, cujus cadaver *Populus*  
*Romanus* odio victus dejecit & pedibus calcavit.  
Eximium tamen, meo judicio, & singulare beni-  
gnitatis Divinae argumentum est, inlustri, aut certè  
honesto, loco natum esse: quod

*Non facile emergant, quorum virtutibus obstat  
Res angusta domi.* Imò,

*Generosa in ortus semina exurgunt suos:*  
Et, ut *Lyricæ* Princeps memorat,  
*Fortes creantur fortibus, & bonis  
Est in juvencis, est in equis, patrum  
Virtus, nec imbellem feroces  
Progenerant aquile columbam.*

B 3

Invitat

7



Invitat me hic locus pro re & tempore studiosos  
juvenes, quos natalium splendor præ aliis magnifi-  
care voluit, ad capeſſenda ſtudia virtutemq; am-  
plexandam ex tragædô compellare.

*Agite, ô propago clara, generoſam indolem  
Probate factis, gloriam ac laudes Patrum  
Superate, & aliquid facite, propter quod Patres  
Adbuc juvet vixiſſe, facietis ſcio,  
Sic eſt orti.*

Sed ut, quo digreſſus, redeam: Optimi paren-  
tes nihil prius habuerunt, quàm ut modò natum  
filiolum ſuum horrendis Protoplaſtarum noſtro-  
rum delictis imbubinatum, ſacro baptiſmatis lava-  
cro, non face ac ſulphure, aut ſquillis, quæ vetus eth-  
nicorum in expiando ſuperſtitio fuit, luſtrarent, &  
tam nobile depositum Deo ruſſum conſecrarent.  
Qua in re memoratu dignum occurrit, *Joannem  
Caſelium*, virum famâ meritisq; in rem literariam  
inclutum, ſuſcepiffe noſtrum ex ſacro baptiſmate,  
& ſuam interpoſuiſſe fidem, ac preces ſinceræ pieta-  
tis ac cultus, quo Divinam Majeſtatem toto vitæ de-  
curſu veneraturus eſſet noſter, & augurium quaſi  
lætum dediffe, pro filiolum ſuum preſtaturum veſti-  
gia *Caſeliana* & gloria literarum non minus fore in-  
luſtrem.

Porro



Porro officiosissima mater, anxia tam charæ so-  
bolis, quanto amore, studio atq; cura profecuta filio-  
lum suum! quàm ardentissimis precibus, neq; irritis  
votis Deo eundem commendavit! tum præcipue,  
ubi ad somnum compositura cunas agitaret, aut la-  
ctandum uberibus admoveret, & vix balbutientem  
sacras precatiunculas doceret: ut cum lacte mater-  
no ipsam pietatem simul hausisse sit credendum.  
Neq; enim, obliteratis nativæ pietatis elementis, de-  
bitum lactandi officium filiolo suo denegare delica-  
tula voluit, cæteroquin peior futura bestiis, quæ fœ-  
tus suos non minore curâ alunt, quàm olim ὀφ-  
γασμῷ concepere; pudendo quarundā matrum vi-  
tio, quæ vinculum illud coagulumq; animi & amo-  
ris, quo parentes cum filiis natura confociat, inter-  
scindunt, & impurissimis scortis charissima pignora  
conjugii permittunt, nesciæ stolidæ liberos spiritum  
ducere in animum & in corpus suum ex corpore &  
animo deterrimo; instillari simul semina nequitiae,  
& cum pravo lacte corruptos mores ingenerari:  
quemadmodum hirtam lanam agnis caprillo lacte  
nutritis succrescere, contra vero hædis ex ovillo  
lacte pilos tenerescere, videmus.

Ipse pater maximus arbitër ingeniorum, &  
erudiendæ juventuti non factus, sed natus, cum vi-

vidi

8



vidi & flagrantis ingenii scintillulas jam micare videret, Musis initiandum nostrum infantem penè tradidit. Semina enim in corporibus humanis divina dispersa sunt, quæ, si bonus cultor ac cesserit, similia origini prodeunt, & paria his, ex quibus orta sunt, surgunt: si malus, non aliter quam humus sterilis ac palustris, necat ac deinde creat purgamenta pro frugibus. Ita *Hippocrates* noster, *Soranus Ephesius*, in futuro medico, *Plutarchus* quamcunq; disciplinam capeffente, naturæ promptitudinem & acumen ingenii requirunt, non aliter ac bonus fundus sementem facturo necessarius est: φύσιος γὰρ ἀντιπραττούσης κενεὰ πάντα, ut loquitur summus Præceptor. Quamvis nec illum contemnendum censeam, qui malignitatem suæ naturæ vicit, & se ad sapientiam non perduxit, sed extraxit, ut in *Cleanthe Phanii* filio ejus rei exemplum est, quem cereis tabulis comparare *Zeno* solebat, quibus difficilius inscriberentur literæ, sed quæ eas ægrius deleri paterentur.

Παιδομαθίην quoq; requirebat medicinæ parens, quod artem medicam longam, vitam humanam brevem, nec compendiaria via vastissimum medicinæ ambitum absolvi sciret: ὅπως ἡ μάθησις ἐμφυσιωθεῖσα δεξιῶς καὶ ἐναλδῆως τοὺς κάρπους ἐξενέγκηται: adeo scilicet

à teneris



*à teneris assuescere multum est.*

quod ingenia illa ætate inexpleta bibant rorem sapientia, & cerea facile formentur, ac commissa fideliter conservent, ut Principis Poetarum verba huc meritò commodare queam:

*Tu modò, quos in spem statues summittere gentis,  
Præcipuum jam inde à teneris impende laborem.*

Porro quantâ sollicitudine quæsit<sup>o</sup> nostro pueritiæ erudiendæ ac formandæ magister, non ex trivio, lupanari, popinis, caupona, extractus, nec qui meliorem ætatem inerti otio traduxerat, sed spectatæ morum elegantia atq; eruditionis laudatæ: ne scitissimus puer pravis exemplis magistri ad errorum avia transvorsum ageretur, neu sub ignavò præceptore nihil agendo pueritia MEIBOMII adolesceret.

*Qui serere ingentium volet agrum,*

*Liberat arva fruticibus,*

*Falce rubos filicemq; refecat,*

*Ut nova fruge gravis Ceres eat.*

Quantum enim industria coloni agrorū fertilitati conferre potest; tantum etiam fidelis ac gnavus magister omni doctrinarum genere fecundandis, morumq; venustate ornandis, puerorum ingeniis proficiet, si subnascentes vitiorum vepres ex animis excindere,

C

scindere,

9



scindere, exemplo monstrante viam mores emendare, impigro exercitio socordia excitare, omnisque virtutis & disciplinæ electissima quæque semina animis tenellis mandare allaboret.

Exquisitissima vero cura peragebatur disciplina sub Joanne Godekenio, postmodum *Aulae Groningensi* D. Julii à sacris concionibus, & Joanne Freitagio, primùm *Academiae Juliae Professore*, hinc *Osnabrugensium Episcopi & Comitum Teclaburgensium medico aulico*, & tandem *Academiae Groningensis Professore*: qui ita MEIBOMII nostri concinnarunt ingenium, ut anno ætatis tertio decimo lectiones publicas adire cœperit, testatus exemplo suo, illud *Flavii Vopisci* verum esse: neminem unquam pervenisse ad virtutum summam jam maturum, nisi qui puer seminario virtutum generosiore concretus aliquid inclutum designasset.

Academiae patriæ, i. e. liberiori vitæ, traditus non vino aut voluptatibus se mancipavit, aut otio lætissimam adolescentiam traduxit; sed flagrantissimus amore discendi, quamvis omnis politioris literaturæ, vitæque per virtutes actæ, exemplar toto die sibi propositum, Parentē, domi haberet, publicos Professores diligentissimè audivit, viros undique doctissimos & celeberrimos: quorum institutione



tionē ita penum eruditionis suę locupletavit, ut bre-  
vi, quantum profecisset, sub *Georgio Calixto*, postea  
Professore, & magni nominis Theologo, publicā di-  
sputatione testaretur: quo cum viro amicitiam co-  
luit in extremam usq; senectutem fidam & incor-  
ruptam. Totus autem in studiis literarum bonarūq;  
artium MEIBOMIUS erat, nec dies continuandis stu-  
diis sufficiebant, partem etiam noctium iisdem im-  
pendebat, ne floridam ætatem, ac tempora discendi  
inerti otio consumeret: cum ad solidam eruditio-  
nem parandam divina benignitate sibi cuncta con-  
spirare videret, gnarus, studiorum amaras radices,  
fructus dulcissimos, & eruditionem inter prospera  
emolumento fore, inter adversa refugium conce-  
dere. Et profecto hæ artes à maximò bonò libera-  
les dictæ, quod animum vitiorum mancipio & erro-  
ribus vindicent & liberent, severiora studia tra-  
ctanti maximè utiles & necessaria: quarum scientiā  
etiam aliud agentes nos ornat, atq; ubi minime cre-  
das, eminet & excellit: quæ etiam nostro plurimum  
gloriæ atq; existimationis conciliavere: quod iis  
tanquam exquisitissimis condimentis uteretur, seu  
ingenii monumenta in publicum proferret, seu  
consultando ægrotantium saluti prodesse cuperet,  
seu in familiari conversatione doctis, politicis atq;



amœnissimis sermonibus præsentēs oblectaret, aut  
occasionēs ac tempora bibendi falleret.

Maximos in his studiis fecerat progressus, ut, si  
ratio temporis atq; privatæ fortunæ ita tulisset,  
quamcunq; disciplinarum publicè profiteri ac do-  
cere cum laude potuisset. Quantus erat in *Græcis*,  
quantus in *Latinis* literis, in quibus præceptorem  
habuerat, Phœnicem Germaniæ, ut noster loquitur,  
*Johannem Caselium*! Quàm ille scitissimis & quæ-  
sitissimis verbis scripta sua, quæ publici juris pro-  
stant, aut adhuc in certum tempus condita servan-  
tur, ornare solebat. Neq; enim jejuna atq; arida  
esse debent, quæ de rebus magnis dicuntur & scri-  
buntur, quod nec medicina ingenio renunciaret. Ipsæ  
hæ literæ, dum summam sapientiam consignatam  
habent, ne quis verborum ambitus solùm me in illis  
mirari arbitretur, animum hujus ita virtutibus exag-  
gerarūt: ut non modo res dubias & obscuras exqui-  
sitè penetraret & cognosceret, sed & earum eventus  
prudens futuri arbiter divinaret, & consilio præsen-  
tissimo pro re ac tempore auxiliari nosset.

De poesi nil dicam, quam inclinatione quadam  
naturali & hæreditariâ quasi quadam possessione à  
Parente, Poetâ nulli nostro ævo secundo, accepisse,  
sed cum ea solertiam multamq; exercitationem  
con-



aut  
ut, si  
set,  
do-  
recu,  
orem  
ituz,  
quz-  
pro-  
van-  
rida  
scri-  
ipse  
tam  
illis  
rag-  
pui-  
tus  
en-  
n  
à  
e,  
m  
i-  
contendisse, videri poterat. Testantur plurima  
carmina honori magnatum aut amicorum conse-  
crata; quàm illa reconditam eruditionem omnemq;  
venerem ac gratiam poeticam spirent : inter quæ  
memorandum occurrit Epicedium, *Divo JOHAN-*  
*NI, Episcopo Lubecensi*, Mæcenati suo, literatorumq;  
munificentissimo, Principi omni meâ laude majori,  
defectis jam viribus, tremulâ manu, à nostro scri-  
ptum, cum jam fatali lecto affixus hæreret, & princi-  
pia peremptorii morbi se oppidò proferrent.

In Logica quoq; & Metaphysica, quæ cum  
omnibus scientiis, teste summo Philosophorum,  
communicant, quas & cuivis docto, maximè vero  
professorio homini admodum necessarias sciebat,  
expeditissimum fuisse memini. Sic *Cornelius Mar-*  
*tini*, Philosophus Inlustris, referatis adytis secretiori-  
bus harum disciplinarum acerrimam nostri men-  
tem exercuerat. Nec minus Rhetoricam MEIBO-  
MIUM calluisse constat, ut de omni quæstione pul-  
chrè, & ornatè & ad persuadendum aptè dicere, pro  
dignitate rerum, ad utilitatem temporum, cum vo-  
luptate audientium posset, etsi in Rhetorum scholis  
declamationibus linguam & vocem non exerceret:  
Græci Latiniq; elegantioris sermonis studium ad  
hanc disciplinam eum provocabat.



Historias, & res præclare gestas Græcorum, Latinorum aliorumq; populorū, instinctu quasi quodam naturali, quod Parentem Historicum haberet in primis celebrem, studiosè legit: quæ, ut rerum Romanarum ab urbe conditâ florentissimus Author monet, illud præcipue salubre & frugiferum habent: omnis te exempli documenta in illustri posita monumento intueri; inde tibi tuæq; Reipublicæ, quod imitere, capias; inde fœdum inceptu, fœdum exitu, quod vites.

Mathematicum cognitionem non tralatitiam sub Schapero hausit: quam demonstrandis quibusdam propositionibus medicis utilem, excitando & poliendo ingenio aptam Galenus docuit: cum primis vero Astronomiam non modò intelligendis medicorum scriptis, sed & medicinam facturo ex præcepto summi Præceptoris necessariam, admodum commendatam sibi habuit: qui insignes temporum mutationes, utraq; solstitia, maximè æstivum, & ex æquinoctiis autumnale, observari mandaverat: quod iisdem purgari corpora, partesq; circa ventrem uri aut secari ante dies decem factu inconsultum judicaret: quemadmodum & siderum ortus, ut *Canicule*, *Arcturi*, & *Vergiliarum* occasus observari voluit: quod his fere diebus morbi crisi experian-



experiantur, aut in aliam formam statumq; fere mutentur.

Naturalis philosophiæ scientiam, ut decoram viro crudito, quod, ut suadē medulla ait, animorum ingeniorumq; naturale quoddam quasi pabulum cognitio contemplatioq; naturæ afferat; ita maxime necessariam medico non nisi cum vitâ deposuit: quod hujus principiis innixa medicina latissimè se diffundat: ut nisi in horum plenam possessionem quis venerit, frustra sit futur<sup>9</sup> omnis philiatri labor, & nobilissima artium tali cassa fundamento corruet, aut certe vacillabit.

Politici arcana electissimis authoribus instructus penetraverat, cunctarum disciplinarum ambitum & encyclopædiam animo suo recepturus; & quod se mundanum cum *Diogene*, ac in medio rerum & hominum vitam agentem jura atq; administrationem suæ civitatis ignorare indecorum, sciret: qui dum regnorum ac rerum publicarum historias animo suo complectitur, eundem & gubernandi rationem simul comprehendisse, quis dubitet? Quem admodum & Theologiæ, & Jurisprudentiæ non perfunctoriam cognitionem habuisse docti sermones de rebus gravissimis sæpius habiti testantur.

Nec 12



Nec minor nostro cura fuit, ut, cum abstersâ  
infcitiæ rubigine animum plurimarum rerum sci-  
entiâ indnisset, eundem vitiorum quoq; sentibus  
purgaret, erroribus vindicaret, & ad honestè benèq;  
vivendum adduceret, atq; adversus cupiditates im-  
mensas, sollicitudines inanes, cunctaq; fortuita ob-  
duraret.

His positis literarum ac disciplinarum funda-  
mentis facilis & prosper ad medicinam transitus no-  
stro fuit: quò sponte sua, non tamen sine consilio  
prudentissimi Parentis inclinaverat: quod docto-  
ris sit intelligentis videre, quò ferat sua natura  
quemq;, & eâ duce utentem sic instituere. Cum enim  
constet, *ὅτι πάντα πάντων εἶναι*, consultum fuerit Pythicæ  
obtemperantem inscriptioni *ἀντὶν κατὰ μαθεῖν*, atq; uti  
suo ingenio, quò natura inclinare videtur, neq; ad  
ad aliud vitæ studium trahendo huic vim facere.  
Ut enim corporum magnæ reperiuntur diffe-  
rentiæ, quod alia valida, & athletico habitu, lu-  
ctam sustinere queant, alia cursus celeritate præ-  
stent, & formarum quædam venustate, quædam  
gravitate se commendent; sic & animorum varia  
studia sunt atq; inclinationes, quibus operari pro  
sua quisq; natura studebit, ne invitis, quod aiunt,  
canibus



canibus venari, propriæq; naturæ vim inferre con-  
tur.

Adoleverat jam noster MEIBOMIUS, & sub  
*Wolffio* profectus sui in medicinâ publica specimina  
ostenderat: qua de re Parens, excitus famâ *Danielis*  
*Sennerti*, Principis sua ætate *Germaniæ* medicorum,  
& de re medicâ apprime meriti, continuandorum  
studiorum *Witebergam* eum ablegandum duxit:  
apud quem etiam biennium commoratus, & labo-  
ribus Chemicis exercitus, operam navabat sedulam:  
quod non modò loci ratio exempla æmulandi atq;  
industriæ daret, ipsaq; artis amœnissimæ pulchri-  
tudo ad se cognoscendam invitaret; sed & eximius  
Præceptor morari hujus tēpora nollet, ac, qua posset  
ratione, tantæ expectationis juveni prodesse vellet;  
noster vero quasi astro quodam inclinante in amo-  
rem studiorum magis ac magis ageretur, nec præci-  
pitem occasionem inertiam præterlabi sineret, tem-  
poris



poris jacturam pretiosissimam ratus: quod omnia  
aliena, tempus tantum nostrum sit. In hujus unius  
rei fugacis ac lubricæ possessionem naturam nos  
misisse, arbitrabatur, ex qua nulla nos corporis volu-  
ptas, nulla animi segnities, nulla molestia expellere  
debeat. Cæterum in medio cursu studiorum quar-  
tanâ gravissimâ, quæ tum epidemia erat, correptus,  
cum nec quicquam medicina in contumacissimo  
morbo proficeret, consiliô *Sennerti* solum vertere,  
aerisq; mutandi *Lipsiam* concedere coactus: sed cum  
nec illic morbus mitesceret, ægerq; jam duplici  
quartana conflictaretur, revocatus domum, vix ex-  
acto tertio quadrante anni tam gravi morbo fuit  
eluctatus.

Humiles & plebeix mentes, *Auditores Incluti*,  
in obscuro domi latent, & torpidæ uni glebæ sem-  
per affixæ hærent: ætheriæ vero atq; inlustres ani-  
mæ cælum imitantur, & perpetuo gaudent motu.  
Sic *Democritum* magni nominis philosophum lu-  
stratâ *Perside*, *Arabiâ*, *Æthiopiâ*, *Ægyptô*, summam  
scientiam sibi comparasse; idemq; *Pythagoram*  
clarum sapientiâ fecisse, ferunt. *Galenus* noscendo-  
rum medicamentorum studio *Lemnum*, *Cyprum*  
& *Syriam* adiit. *Ciceroni* non satis erat apud *D.*  
*Mucium* jus civile didicisse, apud *Philonem Acade-*  
*micum*,



*micum*, apud *Diodorum Stoicum* philosophiæ partes  
penitus hausisse, *Achajam* quoq; & *Asiam* peragrasse  
dicitur, ut omnem omnium artium varietatem  
complecteretur. Pariter & nostrum inexpletus  
amor discendi occupaverat, ut non dum desiderio  
suo satisfactum crederet, nisi & alios alibi doctores  
audivisset. Ut enim apes, providum natura animal,  
non uno florum genere contentæ, melleum ro-  
rem undiq; legunt, & futuræ necessitati in alvearia  
condunt: ita & nostro obstinatum erat, ad alias visere  
terras, & quicquid ibi eximium, rarum ac memora-  
bile occurreret, in animum condere, in tempore &  
re profuturum; maxime vero doctorum virorum  
amicitiam sibi comparare: quod, nisi doctior, ab illis  
nunquam esset recessurus.

Vix inveterato isto morbo MEIBOMIUS con-  
valuerat, dum se itineri accingit, *Jenæ Gryphian-*  
*drum* compellat; inde *Norimbergam* se conferens  
humaniter exceptus à *Georgio Remo*, Jcto & Rei-  
publicæ ejusdem Consiliario Clar.<sup>mo</sup>, amico pater-  
no: qui omni officiorum genere eum dum afficit,  
pene in ruborem dedit. Salutavit & *Philippum*  
*Camerarium*, admodum senem, sed firmâ adhuc  
valetudine. Inde *Altorsum* excurrrens *Virdungo*,  
*Piccarto* innotuit, ut & *Hoffmanno*, ingenio & do-



Strinâ medico & philosopho celeberrimo: cum quo  
necessitudinem inchoatam per literas postmodò in  
*Italiâ, Helmestadi & Lubecæ* continuavit & stabi-  
livit. Jam in procinctu noster erat *Augustâ*  
*Vindellicorum* maturare iter in *Italiam*; sed  
quia tum grave bellum in *Istria* *Ferdinando*  
Archi Duci, postea Imperatori, cum Venetis  
erat, & loca, per quæ transeundum foret, præsidia-  
rio milite tenerentur, consilium mutare, atq; *Argen-*  
*toratum*, nobile doctrinarum domicilium, petere  
decrevit, ne sic quidem malo consilii successu: quod  
medicos eximios; *Rudolphum Saltzmannum, Ageri-*  
*um & Melchiorum Sebizium*, illic offenderet, quibus  
usus per quàm familiariter; cum primis vero *Casparo*  
*Veckerlino* Medico & Botanico egregio, &  
Ampl.<sup>mi</sup> nosocomii ibidem præfecto: cujus hospi-  
tio usus, & visitandis ægrotis lateri continuus adhæ-  
rens, quæ hætenus literis tradita legerat, multis &  
raris experientiæ documentis confirmavit.

Exactò illic semestri, primò vere, cum jam  
expedito itinere angustias alpium penetrare lice-  
ret, in *Italiam* contendit, consummaturus illic  
studia: quod illud Lyceum toto orbe famigeratissi-  
mum esset: cui nihil in quovis disciplinarum genere,  
quod



quod studiosæ juventuti conducere posset, deesse  
*Serenissima Respublica Veneta* voluit. Sive enim  
exercitia anatomica & casus chirurgicos insignes &  
varios, hortumq; medicum herbarum & planta-  
rum numero nulli secundum, sive medicinam  
theoricam, *Græcorum, Arabum, Latinorum* vete-  
rum & recentium medicorum scriptis erutam, sive  
ipsam praxin & exempla medendi, ubi alieno peri-  
culo, ductu & auspiciis maximorum virorum, ad-  
discere datur, quæ in tempore & loco securè imitari  
liceat, quis æquâ animi lance expenderit, nullam in  
universo mundo magis commodam occasionem  
cuncta illa cognoscendi, nec magistros aut magis  
officiosos, aut expertos, omnes certe eruditionis ac  
nominis fama gloriosos, reperiet. Agmen inter  
hos ducebant, adhuc meo tempore superstites, *Cæsar*  
*Cremoninus*, primæ sedis philosophus, Nationis Ger-  
manicæ Medicorum Protector, brabeuterii pere-  
grinorum, qui juramento Pontificiæ religioni se ob-  
stringi nolunt, Præses, *Jesuiticâ* factione territorio  
*Veneto* pulsâ Orator olim ad Pontificem Romanum  
missus, itemq; *Fortunius Licetus*, pulcherrimis scri-  
ptis editis celeberrimus: quos sedulo audivit do-  
centes, doctus ab *Hippocrate* Ἰητὸν Φιλόσοφον ἰσόθεον dici,  
nec citra jacturam bonæ existimationis philosophiæ



tractationem, nisi cum vita, à doctis medicis penitus deponi.

Præceptores illic in medicinâ habuit MEIBOMIUS *Hieronymum Fabricium* ab *Aquapendente*, *Adrianum Spigelium*, *Bruxellensem*, Chirurgo & Anatomicos summos, *Sylvaticum*, *Salam*, *Fonsecam*, *Joannem Prevotium*, Horto Medico tum Præfectum, primo loco postmodò medicinæ Professore, Virū summum, quo cum initam familiaritatem patriæ redditus sincere coluit: cui & me plurimum debere, multumq; sub eo profecisse ingenuè profiteor. Audiit & *Joannem à Colle*, *Andregetium*, omnes medicos insignes, qui dignitatem suæ professionis magna cum fama sustinebant: quos etiam ad ægros sedulò comitabatur, ut quæ ab ipsis Doctoribus tradita, aut diligenti lectione memoriæ mandata habebat, exemplis, quæ ad magnas res percipiendas admodum necessaria judicabat *Plato*, porrò confirmaret, pariterq; alieno periculo medicinam facere addisceret: cum omni in re, ut monebat *Galenus*, τεχνωθῆναι, postea aggredi artis opera, oporteat, ne per mortes, ut loquebatur *Plinius*, experimenta agere medici deferantur.

Quid mirum, Auditores Honoratissimi, sub tantis præceptoribus exquisitam omnis scientiæ  
cogni-



cognitionem MEIBOMIO obtigisse, facilemque atque  
expeditam praxin evenisse, cum se non somno, inertia  
atque otio traderet, aut vino divini ingenii vigorem  
obrueret, aut Venere, quæ ne quidem inter res  
turpes illic, aut illicitas, habetur, exhaustus aut voluptate  
confectus marcesceret?

*Luxuries, prædulce malum, quæ dedita semper  
Corporis arbitriis hebetat caligine sensus,  
Membræque, Circeis effœminat acrius herbis;  
Blanda quidem vultu; sed qua non tetrior ulla  
Interius fucata genas, & amicta dolosis  
Illecebris, torvos auro circumligat hydros:  
Illa voluptatum multos innexuit hamis.*

Voluptates certè blandissimæ Dominæ sæpe  
maiores partes animæ à natura detorquent, & plurimum  
ad extinguendum animorum vigorem possunt: ut in tot præliorum victore exercitu suo ad  
Capuam Hannibal expertus, & de Gallogrecis Livius eloquentiæ ac fidei præclarus testatus. Circe, A.  
voluptas est, quæ dum jucundo motu sensus titillat,  
veneficio quasi quodam inficit, bestiisque simillimos  
suos clientes reddit, & si major sit, atque longior, Archytæ  
Tarentini, magni in primis & præclari viri sententia, omne animi lumen extinguit.

Vos 16



— — *Vos ô quibus integer ævi*

*Sanguis adest, solidaq; suo stant robore vires,*  
circumspicite paulò curatius venereos nepotulos  
aliosq; voluptarios, canescere tales ante annos atq;  
effœtis viribus properare sua fata videbitis, & quàm  
illos vix dum viros factos cruda senectus occupet,  
marcidos & rebus gerundis cætera ineptos. At  
nostro MEIBOMIO longe alia mens, alius animus:  
noverat voluptate nullam capitaliorem pestem esse,  
atq; ingenium, quod sibi natura dederat eximium,  
desidiâ hebescere, mucoremq; contrahere, non  
aliter, ac ferrum rubiginem. Namq; ut ferrum,

— — *dum transit in usus,*

*Affiduo splendore micat, vultuq; nitenti*

*Audet ad argenti decus adspirare superbum:*

sic & studiis assiduis abstergeri situm ingeniorum  
splendoremq; cælestem accipere animos hu-  
manos, ac se ipsis inlustriores reddi certum.  
Corpora quidem defatigatione ingravescere,  
sensusq; ab objecto improporcionato lædi; at ani-  
mum exercitando levare potius atq; sublimiori in-  
telligibili proposito illustrari magis, faciliusq; in-  
feriora percipere, philosophorum decretis constat:  
cum non aliter, atq; aspectus rerum à circumfuso  
aere lumen, à disciplinis splendorem mutuetur.

*Patavio*



*Patauiô cætera Italiae celebriora loca* MEIBOMIUS  
lustraturus *Ferrariam* abiit, inde *Bononiam*, matrem  
illam studiorum, ubi *Vlysses Aldrovandus*,  
summum naturæ animalium interpretem allocu-  
tus, & *Florentiam* pulcherrimam *Europæ*, & urbium  
*Hetruriæ* principem, se contulit. Quin

*Et flavum vidit Tyberim Romæq; cadaver,*  
*Spirantesq; aliquid tristes immane ruinas.*

Salutavit illic *Fabrum*, *Prosperum Martianum*,  
scriptis in *Hippocratem* commentariis nobilem,  
*Neapoli Fabium Columnam*, à quô multa sibi bene-  
ficia collata sæpe memoravit, item *Ferdinandum*  
*Imperatum*, aliosq; quos *Neapolis* aut *Roma* tum  
præcipuè admirata. *Mediolani*, nam ingens spatium  
terrarum transilire cogor, quòd festinare angustia  
temporis jubeat, *Septalium Patritium* & *Medicum*  
insignem, & scriptis admodum inlustrem, compel-  
lavit. Ornatissimi Juvenes,

*Ite nunc fortes, ubi celsa magni*  
*Ducit exempli via.*

Hæc sit vobis peregrinaturis meta proposita, non  
otio, libidini, aut luxuriæ, datâ liberioris vitæ pote-  
state, vos dedere, non exóticos assumere mores, ob  
quam rem peregrinari olim *Lacedæmonii* prohibiti,  
& inania ceremoniarum domum reportare, non

E

populo-



populorum habitus atq; vestimenta assumere; non exploratos modò habere urbium ac regionum situs; sed & si quid ex ultimâ antiquitate superet, literis traditum ac visu dignum, cognoscere: si quid fœdum, rude atq; asperum, animo insedit, expolire atq; exasciare: si quid vobis patriæq; vestræ egregio aliquando esse possit, addiscere: quod non nisi accuratissimâ vivendi normâ, studiis indefessis, & frequenti conversatione & familiaritate cum viris eximiis obtinebitis.

Nulla enim res, iudicio *Senecæ*, magis animo honesta induit, dubiosq; & in pravum inclinabiles revocat ad rectum, quàm bonorum virorum conversatio. Paulatim descendit in pectora, & vim præceptorum obtinet frequenter audiri, aspici frequenter. Occursus me hercule ipse sapientium juvat, & est aliquid, quod ex magno viro vel tacente proficiatis. Zenonem Cleanthes non expressisset, si eum tantummodo audivisset, vitæ ejus interfuit: *Plato & Aristoteles* & omnis in diversum itura sapientium turba plus ex morib<sup>9</sup> quam ex verbis *Socratis* traxit. Animum debetis mutare non cœlum: licet vastum trajeceritis mare: licet, ut ait *Vergilius*,

—————*terraeq; urbesq; recedant:*  
sequentur vos, quocunq; perveneritis vitia. Hoc  
idem



idem cuidam querenti *Socrates* apud *Senecam* ait:  
Quid miraris nihil tibi peregrinationes prodesse,  
cum te circumferas? Premit te eadam causa, quæ  
expulit. Quid terrarum juvare novitas potest, quid  
cogitatio urbium aut locorum? in irritum cedit ista  
jactatio. Quæris quare te fuga ista non adjuvet? te-  
cum fugis. Onus animi deponendum est, non ante  
tibi placebit ullus locus.

Redux Italiâ *MEIBOMIUS* *Basileam* venit,  
insignem tunc præclaris Medicis, *Baubino*, *Platero*,  
*Stupano*, *Chmielecio*, qui tum Academiam illam eru-  
ditionis suæ radiis illustrabant, ut à viris præcipuæ  
dignationis exantlatorum hætenus laborum præ-  
mium acciperet: à quibus etiam Anno *MDCCXIX*.  
*XIII*. Januarii Doctor Medicinæ renunciatus.

Vix domum noster reversus erat, cum ab Ill.<sup>mo</sup>  
Principe, Duce *Brunsvicensi*, in numerum Professo-  
rum Medicinæ allegeretur, consilii illius authoribus  
cæteris ejusdem facultatis Doctoribus: quod eximi-  
um hunc virum Academiae *Juliae* magno ornamen-  
to fore, ejusq; animum omni scientiarum genere  
non leviter tinctum, sed penitus imbutum, otiiq;  
indignantissimum viderent. Et profecto *MEIBOMI-*  
*US* cum *Pacuvio* oderat

E 2

homi- 18



—homines ignava opera & Philosophia  
sententia.

Nihil enim fieri posse indignantius neq; intoleran-  
tius arbitrabatur, quàm sapientem rerum humana-  
rum indeptis honoribus otio marcescere ignavum  
& desidem, aut inanis speculatione tempora rerum  
gerendarum consumere: oportere eum versari  
exerceriq; in rebus cominus noscendis periclitan-  
disq;, eaq; omnia acta & eventa firmiter meminisse,  
& perinde sapere & consulere ex iis, quæ pericula  
ipsa rerum docuerunt. *Ἀδύνατον δὲ καλῶς πράττειν τοῖς μὴ τὰ  
καλὰ πράττουσιν*, ut Philosophus monebat. Hinc palma-  
rium omnis operæ atq; laboris fuit, ut Spartam  
quam nactus erat, pro virili egregiè ornaret: qua de  
re scrutandis doctorum scriptis noctes diebus jun-  
gebat heluo librorum avidissimus, quò publice do-  
cendo & disputando privatisq; exercitiis studiosam  
juventutem egregie juvaret, dubitationum nodos  
expeditè solveret, obscura & perplexa dilucide ex-  
plicaret, falsa solidè refelleret. Nihil enim observa-  
tione & memoriâ dignum in mentis suæ penetrali-  
bus abstrusum servabat, quod non cum curiosis au-  
ditoribus liberaliter & sine fuce communicaret:  
ita tamen, ut non minus ægrotis, qui consilium ejus  
implorabant, salutaress manus porrigeret: ut inclutæ  
Acade-



Academiae insigni honori, studiosae juventuti magno emolumento, suis firmo praesidio, agris praesentaneo auxilio toto illo Ducatu vicinarumq; provinciarum districtu esset, nomenq; MEIBOMII late se explicaret, & in oculos, in aures, in sermones, hominum se diffunderet.

A. *Providit ille maximus mundi parens,  
Cum tam rapaces cerneret fati minas,  
Ut damna semper sobole repararet nova.  
Excedat aedum rebus humanis Venus,  
Quae supplet ac restituit humanum genus,  
Orbis jacebit squalido turpis situ.*

Venerat jam MEIBOMIUS ad annos plenae maturitatis, & se studiis perpetuis districtum rei familiari curandae imparem fore, nec majus probis quam ex matrimonio solatium esse, & revertentibus post laborem maritis vix honestius dari, quam uxorium levamentum, cum *Valerio Messalino* judicabat: praecipue verò divino instituto parendum ratus, consilio Parentis *ELISABETHAM AVERBERGIIAM* virginem, splendidis natalibus ortam, nec minus pudicè ac benè educatam Anno 1622. 13. Octobr: *Helmæstadii* matrimonio sibi junxit: in quo vixerunt conjuges magnâ concordia, per mutuam caritatem, & invicem se anteponendo; & quod singularis exempli



foemina rem familiarem exquisitissimè dispensaret,  
in partem educationis liberorum veniret quàm li-  
bentissime, & molestias tota die medenti occurren-  
tes, atq; animo conceptas, voce, vultu & officiosis  
blandimentis abstergeret. Nuptiæ vero ut solen-  
nes fuere quinq; Principum & duarum civitatum  
legatis presentibus; ita nec sterile, nec improperum,  
conjugium observatum. Nati MEIBOMIO decem  
liberi: *Joannes Henricus, Joannes Gerhardus, Do-  
rothea Elisabetha, Sophia, Anna Sophia, Maria, Anna  
Rosina, Catharina, Henricus & Joannes, Quorum  
Joannes Henricus, Joannes Gerhardus & Joannes  
itemq; Anna Rosina* primis infantiae annis vita con-  
cesserunt: *Dorothea Elisabetha* luculento matrimo-  
nio elocata *Joanni Verlhovio*, civi nostræ Reipu-  
blicæ primario, atq; exquisitis animi & fortunæ  
bonis Ornatissimo. Secundò genita, *Sophia*, nuptum  
data *D. Georgio Reichio*, Reverendissimi Celsissimiq;  
Principis, Divi *JOANNIS, Episcopi Lubecensis, Ducis  
Holsatiæ Medico Aulico*: in cujus laudem multa pro-  
ferre animus foret, nisi hominem præsentem atq;  
intimè amicum in os laudare verecundarer. Harum  
matrimonio avus factus noster, trium scilicet ne-  
potum duarumq; neptium: quem & fatali lecto  
affixum, & suprema jam meditantem maxima filia-  
rum



rum *Verlhorvia*, facili partu soluta, auctum nepote  
admodum hilaravit. Tres reliquæ defuncto pa-  
renti superstites probitate, pudore, rei familiaris ac-  
curandæ solertiâ, omni exemplo talium virtutum  
emendatiores, in acerbissimum luctum coniectæ,  
Laudatissimo nostro Magistratui materiam benè de  
se merendi præstant amplissimam. Superat filius  
unicus, paternarum virtutum non ignavus hæres,  
HENRICUS, felici ingenii & summæ expectationis  
juvenis, propediem ultimâ voluntate parentis ad  
*Academiâ Juliam* continuandorum studiorum  
abiturus: qui ut non vanè auguror, brevi faciet, ut  
quemadmodum nunc nō scitatis in eo patris avi-  
q; similitudinem oris vultusq; & lineamenta corporis;  
ita ingenii, fidei, eruditionis rarissimæ, virtutisq;  
exemplum expressam ad effigiem vobis reddet, ut  
revixisse aut renatum sibi quisq; magnum MEIBO-  
MIUM dicat.

Matrem charissimam Anno millesimo sexcen-  
tesimo vigesimo quinto, vigesimo tertio *Martii*, so-  
lenni funere MEIBOMIUS extulit, & Parentem paulò  
post magnò jam natu, in ipso scilicet vitæ humanæ  
constituto termino septuaginta annorum. Ipse tum  
Magnificus Academiæ Rector domestico vulnere  
graviter ictus: quod intra quadrimestre utriq;  
parenti 20



parenti & duobus liberis iusta faceret. Quos casus  
neq; , ut pleriq; fortium virorum, ambitiosè, neq;  
per lamenta rursus muliebriter tulit, & in luctu stu-  
dia privatiq; ac publici officii labores inter remedia  
erant. Eodem verò anno cum ingenti bello per Ger-  
maniam late fulminarent *Tillius & VValensteinus*,  
terrorq; etiam Musas Julias percelleret, cunctis  
prope ad loca tuta se recipientibus, postremus  
omnium, quod non modo Facultatis Medicæ De-  
canus esset, sed & Prorektor Magistratum Academi-  
cum administraret, *Serenissimi Principis Guelfici*  
permisso ad Socerum *Joannem Auerbergium*,  
Jctum, *Ill.<sup>mo</sup> Duci Megapolitano* à consiliis, tum  
Cancellariæ Directorem, *Suerinum* se contulit: ubi  
& integrum annum commoratus diu latere non  
potuit, fortunâ subscribente industriæ atq; ingenio,  
quod ei natura pulcherrimum dederat : ut fama  
eruditionis suæ radios per universam provinciam  
latè vibraret. Cæterum eadem fatalis belli clades  
cum vicinam Megapolin opprimeret, *Lubecam*  
properavit, rebus suis, quàm fieri liceret, commo-  
dissimè consulturus; memorabili exemplo: catholi-  
cas regnorum calamitates aliis gentibus & provin-  
ciis sæpe incremento fuisse, & doctis non rarò felici-  
ter cessisse suas misérias, ut quæ occasionem dederint  
majoris



majoris gloriæ & ingentium divitiarum. *Zenonem* præcipuū ac primum *Stoæ* Doctore, naufragium ad Piræum in porticum eiecit, & pretiosissimæ mercis iactura ad philosophandū excitavit: quī tum secundis ventis se navigasse testat<sup>9</sup>, quando naufragium fecisset. *Byzantium* & *Græcorum* Imperium desolatum eruditis viris auxit *Italiam*, & *Theodorum Gazam*, *Chrysoloram*, *Georgium Trapezuntium*, *Joan: Argropyllum*, *Chalcocondylen*, & *Lascarin* dedit, viros eximios & doctos, ac pellendæ barbariei, quæ totam *Europam* occupaverat, in primis satagentes.

Excepere *MEIBOMIUM* benignè admodum Reipublicæ nostræ Proceres, omniaq; gratiæ, amoris ac benevolentiæ studia ei detulere, gratulati sibi de tam egregio hospite, quem sibi suisq; civibus consiliō & re profuturum sciebant: quemadmodum & Amplissimi Magistratus judicium amplexati cives flagrantibus studiis, & quasi quadam contentione, ambire ejus amorem, in rebus gravibus, quæ ad valetudinem attinebant, eum consulere, nullumq; humanitatis aut officii genus prætermittere, quō gratiam se inituros confiderent. Vicini quoq; Principes famâ *MEIBOMII* excitati propositis amplissimis præmiis eum accersi ad se curarunt, cujus operâ in difficillimis morbis uterentur, mirati sin-

F

gulares

27



gulares animi dotes & excellentem eruditionem, magnâ experienciâ confirmatam, nullo cum fastu aut ostentatione scientiæ conjunctam, cunctaq; minora publicis rumoribus, qui in novis & incertis rebus plerumq; valescunt. Nec minore studio ad sitarum provinciarum Nobiles occupati erant, ut MEIBOMIUM maximis quibusq; morbis medendi adhiberent, cæteri q; ad exemplum magnatum numerosi ad eum confluebant, tanquam ad oraculum aliquod Delphicum aut Ammonium, aut si quod aliud scriptis nobilitavit antiquitas: quod successus actiones fere fortunaret, &, quod in *Gratiano* Imperatore laudabat *Ausonius*, faciles interpellantibus præberet aditus, nec de occupatione caussaretur: ut non immeritò gloriari potuerit, quod olim *Ennius* ille *Apollo*,

— *A me omnes boni consilium expetunt,  
In negotiis incerti: quos ego ope mea ex  
Incertis certos compotesq; consili  
Dimitto.*

Magistratus quoq; noster, ut tantæ existimationis medicum vadaretur, sublatô è vivis *D. Jacobo Martini*, Physico nostræ urbis primario, honorato proposito salario, Archiatri munus offerri MEIBOMIO curavit: quod tamen, sacramento *Academiae Juliae*



*Julia*, & stipendio Duci Guelfico obligatus, &  
quod factâ pace Lares Julios repetere perpetuò  
animo versaret, suscipere honestissimè recusavit.  
Quemadmodum nec *Archiepiscopi Bremensis*,  
DN. FRIDERICI, curam valetudinis & Archiatri offi-  
cium in se recipere voluit, etsi *Theodorus Langius*  
luculentum in singulos annos stipendium nomine  
Principis sui polliceretur.

Fata destinasse magnum hunc Virum nostræ  
Reipublicæ videri poterant: eâdem enim Archiatri  
functione morte *D. Mollerii* vacante, Senatus pro  
suâ officiosâ & paternâ curâ ac sollicitudine occasio-  
nem non negligendam ratus consilia agitabat, ut  
officium pridem delatum MEIBOMIO denuò offer-  
retur: quod exemplò *Atheniensium*, & more ma-  
jorum, benè merentibus, & quos eruditionis fama  
celebraret, dispensare officia obtineret: hunc vero  
non modò rei pharmaceuticæ gnarum, ac impigrū  
cui civium paratissimum esse; sed & pro accu-  
rato judicio, multâ & singulari eruditione, variis  
jam stipatâ experimentis, controversiis medicis, si  
quæ obreperēt, aut aliunde proponerentur, ac casi-  
bus dubiis solvendis & enodandis, publicæ item in-  
columitati, quâ valetudo conservari, omnisq; noxa  
caveri aut propelli posset, aptissimum & necessari-  
um



um intelligeret. Noster igitur (resignato prius professorio munere, & ægrè, sed clementi, impetratâ dimissione: quod invitus magni nominis Virum exauctorare, & tamen turbatissimis Patriæ rebus ejusdem commodis adversari *Ser.<sup>ma</sup>* Princeps nolit,) iteratam gratiam repudiare, & Deo, qui eam mentem Senatui inspirasset, repugnare noluit; hanc urbem commodissimam arbitratus, in qua, aliis dignitatibus neglectis, quod vitæ restaret, quietus absolveret, & in ejus aliquando gremio vitæ atq; annorum satur & laboribus fessus placidè obdormiret.

Scriptum annalibus MEIBOMII lego, *Adamum Henricum Pentzium*, Aulæ præfectum *Ser.<sup>ma</sup> Regina, Viduæ Gloriosissimi Regum Sueciæ, GUSTAVI ADOLPHI* (cujus aureæ, sed funebri, Coronæ sequentia disticha MEIBOMII inscripta leguntur

## VIRTUTI ET GLORIÆ

S.

**L**ibertas & Religio; victricibus armis  
Adsertæ & fidi sanguinis effluvio,  
Hanc Tibi, Rex Regum, donant, *GUSTAVE*, coronam:  
*(Æternam fidei Fova dat ipse Tue.)*

per



per literas egisse, ut amplissimo stipendio Archiater Reginae MEIBOMIUS constitueretur, additâ promissione similis muneris apud Ser.<sup>ma</sup> Filiam impetrandi: quemadmodum & paulo post Henricus Rantzovius, Toparcha Schmolæ &c. Heros illustris & Consiliarius Regius, promisso mille sexcentorum Joachimicorum annuo stipendio, aliisque Regiæ munificentiae donariis, de surrogando nostro in locum Arnisei, Medici Regii Danici, strenue egit. Cæterum intra fortunam suam MEIBOMIUS manere maluit, quàm summa rerum experiri, fallacis aulæ fulgori fidere, atque inter præcipuos ministros & familiares Regum apparere,

—————*Cum levis magnas opes*

*Huc ferat & illuccasus.*

Scilicet

*Ut alta ventos semper excipiunt juga,*

*Rupemq; saxis vasta dirimentem freta*

*Quamvis quieti verberant fluctus maris,*

*Imperia sic excelsa fortuna obiacent.*

Quin & Principem mortalem, Rempublicam esse æternam, sciebat, atque illò sublatò, aut nullis sæpe caussis infensò, in cassum cedere omnia merita; cuncta in aulis fieri infesta, ipsosque ministros quàm fidissimos aliorum invidiæ, calumniis, odiis, expositos



non rarò maximè periclitari. *Nero Senecam* familia-  
rem præceptoremq; suum ad eligendæ mortis arbi-  
trium coegit: *Papinianum* diu inter aulicos poten-  
tem militum gladiis *Antoninus Caracalla* objecit.  
Atq; uterq; potentiæ suæ renunciare voluerunt;  
quorum *Seneca* opes etiam suas tradere *Neroni*,  
seq; in orium conferre conatus est; sed dum ruitu-  
ros moles ipsa trahit, neuter, quod voluit, effecit.  
Quæ est igitur potentia, inquit porrò *Boethius*, quam  
pertimescunt habentes, quam nec cum habere velis,  
tutus sis, & cum reponere cupias, vitare non possis.

A.      *Stet quicunq; volet potens*  
            *Aula culmine lubrico;*  
            *Me dulcis saturet quies,*  
            *Obscuro positus loco*  
            *Leni perfruar otio;*  
            *Nullis nota Quiritibus*  
            *Ætas per tacitum fluat.*  
            *Sic cum transferint mei*  
            *Nullo cum strepitu dies,*  
            *Plebejus moriar senex.*  
            *Illi mors gravis incubat,*  
            *Qui notus nimis omnibus*  
            *Ignotus moritur sibi.*

Attigit



Attingit tamen quandoq; aulas MEIBOMIUS, curan-  
dorum Principum urbe evocatus; ita tamen, ut,  
quod de Elephantis memoratur, urbe avelli se non  
sineret, nisi brevi illò se reductum iri pacisceretur.  
In primis vero charus fuit Rev.<sup>mo</sup> Celsissimoq; Prin-  
cipi JOANNI, Episcopo Lubecensi, qui cum semper  
quasi in oculis gestavit, paratio tanti amoris *Chri-  
stiano Cassio*, Jcto, & intimæ admissionis supremo  
Consiliario: nec minus Principem noster venera-  
tus fuit, maximum suum literatorumq; Evergetam,  
anxius dubiæ valetudinis: quam, fonticis morbis  
prægravem, non semel eripuit: fatali utriusq; condi-  
tione, quæ Dominum ac ministrum sibi diu super-  
stitesse non permittebat.

Qua vero fide, studiò, curâ, labore atq; indu-  
stria 26. annos Physicatû MEIBOMIUS gesserit, & quæ  
decora laudum animum exaggerarint, arduum est  
dicere: quod vastissima se offerat sylva, ex qua vir-  
tuti ac memoriæ monumentum statuere debeo: ut  
quid primò, quid deinde, quid postremò propo-  
nendum, aut de qua re deniq; differendum sit, con-  
vocato in corde senatu consiliario explicare non  
valeam. Dicamne prius de curiosa & exquisita me-  
dela ægrotantium, qua acie intellectus abdita mor-  
borum penetrabat, & quid utile, quid necessarium,

quid 24



quid acceptum deniq; ægrotis foret, maturo consilio decernebat? at ingens infirmorum numerus, qui eum tantum non obruebant, interpellare videtur accuratam morborum cognitionem, & medendi operosam industriam; nec tantum vacare licuisse occupatissimo, & nunquam fere otioso. Quod si ejus comitatem, insignem apud ægros gratiam atq; auctoritatem honoratam magnificare velim, diversas illas & plurimum distantes virtutes simul concurrisse meritò quis mirabitur. Et studia recolenti, & scripta, quæ in publico prostant, aut abstrusa latent, versanti *ἀδύνατον* fere, & supra vires mortalium, videtur, hominem adstrictum catenatis atq; ærumnosis laboribus animum adhibere potuisse studiis, taliaq; penu eruditionis promere, quæ otium literarium multò maximum requirant.

Placet tamen pauca delibare ex infinito laudum cumulo, quæ in rem præsentem præcipuè facere videbuntur. Suberat MEIBOMIO insignis animi vigor, ingentibus negotiis par, ingenium inlustre & excellens: firma & stabilis memoria, judicium acre atq; accuratum: ut simul in eo contendisse istas animi dotes credam, nec faciliè dari exempla doctorum, qui eas omnes sic in numerato habuerint: accessit cultura exquisita ingenii à primis cunabulis,  
diligens

20



diligens studium & conversatio cum medicis do-  
ctissimis, quorum auspiciis dudum medicinam pe-  
riclitatus fuerat: præterea laborum patientissimus  
erat, ut qui nullas detrectaret molestias, quæ divino  
honori & proximi commodis impenderentur. Hinc  
promptum ei paratumq; erat, rimari penitus  
morborum naturas, causas, eventa, & curationem  
suam cuiq; morbo convenientem adhibere: ita ta-  
men, ut *Argi* instar quæq; diligentissimè lustraret, &  
ad rigidam iudicii lancem expenderet, ne quid ne-  
gliceret, aut temere patraret, quod ægroto noxiæ  
esse posset, neu ad inconsiderantiæ excusationem  
venire cogeretur. Oderat consilia audacia primâ  
fronte læta, tractatu dura, eventu tristia: qui sic insti-  
tuendam curationem noverat, quasi sub ludima-  
gistro, cui omnium dictorum factorumq; exquisita  
constare debeat ratio: & quod prætextu humanæ  
fragilitatis delictum decipientis in periculo homi-  
nes innoxium esse non debeat.

Quid dicam de singulari morum gratiâ, quâ  
ad amorem sui plerosq; invitabat aut trahebat, non  
blanditiis aut fœdis adulationibus, quæ, indecoræ  
Viro docto, ad muliebre ingenium efficaces preces  
sunt, & pessimum veri affectus venenum. Oderat  
noster adulationes, & reginam artium, medicinam,

G

Deo. 25



Deorum inventum existimatum, cui Reges & Principes operati fuissent, & quæ Regibus ipsis, confessione *Theodorici Regis Gothorum* Maximi, majori licentia imperet, quam hi in subditos utantur, alieni arbitrii servam, & mancipium libidinis muliercularum, facere nolebat. Cum collegis pacem sedulò colebat; non minus ab omnibus & singulis honoratus. In conversatione familiari suavis & verborum gratia ac venustate, quæ sale pruriente condita esset, concinnabat conventus amicorum, ac cruditis sermonibus (næ quantum!) oblectabat præsentem, ut qui admirationem sui concitaret, & discedens desiderium & titillationem post se relinqueret. Compellaturis præceptò *Hippocratis*, qui *φιλανθρωπίνην* in medico requirebat, facilis erat, vultu sereno, verbis comis, animos dabat consulturis, & fido consilio juvabat, quantum per morbi rationem licebat; ut nec improspero curationis eventu eundem suggillarent, & si votis responderet medela, tamquam alterum *Æsculapium*, quò se pristinæ sanitati sciebant restitutos, venerarentur.

Peculiaris, non tamen auster, gravitas temperabat amœnitatem illam, ut nec intempestivis ægrorum precibus annueret, nec horrida severitate animos eorum exasperaret, aut dolorum & symptomata-



ptomatum truculentiâ conficeret: ita inter abruptam contumaciam ac deforme obsequium pergebat iter ambitione & periculis vacuum. A fastu quam alienissimus erat, quem nec verbis, vultu, aut exteriore habitu præ se ferebat; (cujus vos omnes, *Auditores amantiſſimi*, testimonium mihi perhibere poteritis) ita tamen, ut vili atq; abjectâ forde atq; in-tempestivâ parcimoniâ se nec defraudaret, nec contemptum sui caussaretur: quotiens convivabatur splendidior magis, quam parcius visus, & in subitariis cœnis, quas amicis ad se venientibus dabat, epulæ nitorem magis, quàm ambitiosum apparatus referabant.

Studiorum amor adeo MEIBOMIUM inflammaverat, ut quamprimum laxandi animi levis quædam intermissio laborum daretur, libris inhæreret, & crescentibus annis desiderium literarum augeretur. Extant operum ejus monumenta præclara & plenissima multifariæ doctrinæ & lēctionis: quæ ut vivo famam nominis clarissimam meruere; ita mortuo eandem ab interitu & gratæ posteritatis oblivione vindicabunt: *Liber commentarius in Jusjurandum Hippocratis, in vitam Mæcenatis alter*: doctæ profectò operæ, raræ & politæ! *De flagrorum in re veneriâ usu* scriptum multo sale ac venustate.



*De Theriacâ Andromachi* nobilis exercitatio. Restant  
*Commentaria in Cælium Aurelianum, de Vitæ medico-*  
*rum inlustrîū, de Ebriaminibus*, aliaq; dignissima, ut  
lucem propediem videant, nec expectationē docto-  
rum diutius frustrentur; quod jam ultimam ma-  
num pleraq; viderint: quamvis hæc aliaq; non dum  
penitus elaborata in certum tempus occultari no-  
ster jusserit. Sed nec magno jam natu quidquam à  
studiis remisit: quin in extremo ætatis, & quotiens  
contracta articulorum debilitas pedum officio  
eum uti non permetteret, impigrè studiis vacabat:  
ut sæpe vererer, ne, corpore morbi diuturnitate, in-  
gravescente ætate, laboribusq; assiduis affecto & in-  
valido, vires penitè prodigeret, & pro mutuo nostro  
& singulari amore cum non raro commoneface-  
rem, abstineret se paulò studiis, & quieti daret, aliisq;  
animi ac corporis laxamentis oblectaret se ac refi-  
ceret. Subrisit MEIBOMIUS, &, turpe sibi fore, respon-  
dit, si currentem in stadio & metæ vicinū se morari  
vellet, nec sentire se in animo ætatis injuriam, & hæc  
literarum studia vera oblectamenta esse, quibus ani-  
mum sine interpellatoribus vergente senectâ re-  
crearet: adeo ut animi cultus ille, quod de *Phalereo*  
*Demetrio* lux doctrinarum & eloquentiæ præcipuus  
testatus, ei esset quasi quidam humanitatis cibus.

Nullus

27



Nullus huic nostro *Seneca Lubecensi* per otium exi-  
bat dies, partem etiam noctium studiis vindicabat,  
ut non vacaret somno, sed succūberet, & oculos vi-  
gilia fatigatos cadentesq; in opere detineret: poste-  
riorum negotium agebat, ut illis aliqua, quæ possent  
prodesse, conscriberet. Et quid melius, *A. Incluti*,  
quàm in mediis vitæ laboribus obdormiscere, & sic  
conniventem somno consopiri sempiterno?

Omniū vero bonorum, quibus profusissi-  
me eum divina benignitas mactaverat, authorem  
Deum MEIBOMIUS agnoscebat: ad cuius hono-  
rem, ceu ad cynosuram nautæ, & proximi com-  
modum cursum actionum suarum dirigebat, non  
fictâ pietate eundem veneratus, eoq; sinceriore cul-  
tu, quo minus pietatem ostentaret. Hinc domi illa  
severa disciplina, ut primis annis verum cultum li-  
beri induerent: ipse exemplo suis erat, nec quid  
dictu visuq; obscœnum per familiâ aut alios trans-  
ire limina domus sinebat, charissimâ conjugē in  
eandem curam domesticæ disciplinæ conspirante.

Frequens aderat sacris concionibus, nisi si son-  
ticis causis, quæ in tanta praxi necessariò multæ  
erant, invitus abstineretur, magnaq; devotione  
sacro sancto Eucharistias Sacramento fruebatur,  
& in ipso quidem peremptorio morbo tanta con-



testatione *Εὐθυμίας* atq; lætitiæ signis, ut cunctis in  
melius mutari morbus, ille, recepto Deo, cælo se  
reddi videretur. Cæteroquin non inani verborum  
jactantiâ religionem profitebatur, vitam propriam  
& totius familiæ ad leges divinas conformare stude-  
bat, acerrimus censor perversissimæ cacozelix, quæ  
novissimis temporibus plures occupavit atq; ever-  
tet.

Exciderat animo amaras radices avaritiæ, nec  
quisquam deferre eum foedi hujus criminis, nisi in-  
justè, poterit, exigendo soltra impensæ curæ fuisse  
acerbum, aut gemmatis fictisq; & inanibus secretis  
suam onerasse conscientiam, atq; in alienas opes  
grassatum: quales vulturii & noctuæ ad aucupia  
crumenarum, ut facetè eos noster nominavit, cre-  
dulos magnates & imperitum vulgus circumdu-  
cunt passim & pecuniâ *προμύσσοις*. Pauperes juxtaq;  
divites pari fide curabat, horum prudenti arbitrio  
red hostimentum laboris recepturus; illis gratuito  
serviebat, impetraturus multò maximam merce-  
dem, gratiam divinam, quæ cæteras actiones pro-  
speraret, & tandem cælo receptum æternum bearet.  
Remedia etiam, quantum per morbi ac temporis  
rationem licebat, festinare malebat, quàm segni ne-  
gigentia curationem prolatare, ægrumq; turpis lu-  
celli



celli gratia lecto diutius attinere: nec prece nec pretio  
venalem cujus cujus vitam habere, & δαληήριον aut  
Φθόριον dare, voluit.

Quantum vero quisq; religione profecerit,  
& qua fide & voluntate maximi Imperatoris signa  
secut<sup>9</sup> fuerit, tum demum se proferet, cum novissi-  
mus & peremptorius hostis vocaverit ad certamen:  
ut *Lucianus* meritò riserit Philosophos, totâ vitâ  
μελέτην θανάτου professos, ultima hora præ cæteris trepi-  
dare, atq; animum despondere. Disputationes  
certè & literata colloquia & ex præceptis sapientium  
verba collecta, & eruditus sermo non ostendunt  
verum robur animi. Est enim oratio etiam timi-  
dissimis audax: quid egeris, tunc apparebit, cum  
animam ages. Et profecto magnus noster MEI-  
BOMIUS maximorum, cum primis sanctissimorum,  
victorum exemplò ita se ad mortem componebat,  
ut sciam quendam relicturus esset, nulla animi  
commotione, nullis tristitiæ signis, quam undantes  
suorum lachrymæ excitare poterant, sed forti, con-  
stanti & læto, animo opperiebatur novissimam ho-  
ram, ut qui portum omnium malorum, requiemq;  
laborum se inventurum, & in ipsò limine melio-  
ris vitæ constitutum jam videret.

Multis

28



Multis abhinc annis occēperat noster confli-  
ctari morbo articulari, viscerum intemperie & de-  
bilitate foetâ generatione seri; quam præter graves  
labores, intempesto aere suscepta itinera, studia in  
seram noctem producta, exhausto calore nativo, ce-  
rebroq; *ὑποκρίνω* assiduus meditationibus infirmato  
(ut sic affecto, arbitrante C. Celso, ne cogitatio qui-  
dem post coenam tuta sit,) augere poterant. Dabat  
quidem intervalla dolor acerbissimus, sed qui mayo-  
re cruciatu aliquando recrudesceret, confirmatâ  
jam debilitate perpetuo acrioris seri proventu, &  
partibus extremis allapsu crebrô humorum ac do-  
lorum atrocitate invalidis: quæ alias pronæ reci-  
piendo humori, quotiens viscerum insitus calor  
ebullitione seri facta illò se exoneraverit, ut nec pri-  
stinam recipere valetudinem, nec pedum ministe-  
rio commodè uti posset, Malum profectò Optimo  
Viro molestissimum, (ut qui compedes istos non  
nisi longo post tempore exueret) sed quod magna  
occasionem daret ingenii monumenta proferendi:  
quòd otii impatientissimus cum ob confirmatam  
pedum imbecillitatem foras prodire non liceret,  
totum tempus tractandis studiis librisq; scribendis  
impenderet. Cum vero progressu temporis mor-  
bus altius radices ageret, & ipsa senectus, licet cruda,  
si



si annos spectemus, oneriforet, natura expellendæ  
materiæ factâ imbecilliore, catarrhi ferini caput  
thoracemq; sæpius inundarunt, ut ante paucos an-  
nos metus foret, ne, firmato in capite malo (quod  
nisi extremis remediis levare tum poterat,) apople-  
xiâ aliove capitali affectu abriperetur. Quin & 6  
aut 7. ante beatissimum obitum septimanis iidem  
dolores consueta loca repetere videbātur, postquam  
jam multo tempore catarrhus pectus oppleverat,  
& cerebrum, quantum noster expectorando quot  
diebus vacuaret, tantum continuo seri defluxu re-  
funderet: sed natura derivandæ materiæ ad extrema  
corporis impar facta, quamquam sæpius, sed irritô  
conatu, id facere tentaret, & cætera satis valida ap-  
paret, sensim morbo se submisit. Hinc rivi serosi  
humoris in fauces & pectus continuo ruere, illasq;  
exasperare, hoc angustare & stringere, hypochon-  
dria referta pravis humoribus in perniciem ægri  
conspirare, noxiosq; vapores exhalare, qui copia &  
mala qualitate anhelitum difficiliorem redderent.

Nec satis malorum erat, nisi & apostema ad  
fauces & palatum situm omnem cibi potusq; libe-  
riorem descensum fere interciperet, ut nec quicquā  
nisi magno cum cruciatu sustinendo corpori æger  
demitteat. Quàm ego magni Præceptoris *Galen*

H

exem-

24



exemplò sæpius nostro arthritidem ad pristina loca  
detonare optavi quod partes nobiles inde exonera-  
tum iri, ægrumq; consueto ac familiari morbo ma-  
gis ferundo fore confiderem! Cæterum in cassum  
cessere vota, nec quicquam levatus morbus; quam-  
vis cuncta remedia, quæ ultima memoria repeti,  
atq; æger admittere posset, à me generoq; accito  
semper consilio ægroti, adhiberentur: sola docu-  
menta singularis patientiæ, vitæq;, ad extremum  
usq; momentum laudabiliter actæ, & finitæ, nobis  
relictæ, quàm ille patienter violentiam effrænati do-  
loris sustinuerit, quàm piè durante morbo se gesse-  
rit, quàm fortiter atq; apertis oculis venientem  
mortem exceperit.

Nullos ejulatus, nullas complorationes, ne ulla  
quidē voces indecoras, edebat, etsi doloris acerbitas  
eum aliquando cogeret invitū ad gemitus cōpressos,  
confiteriq; de atrocitate sævientis doloris: & facere,  
& pati fortia, non tam Romanum, quàm Christia-  
num censebat. Quod si truculentia symptomatum,  
maximè vero ventris dolor, & præfocans respirandi  
difficultas, illum graviter afficeret; noster vero fata-  
lem horam adhuc longius abesse intelligeret, Deum  
tolerantiam tantorum malorum unicè precabatur,  
ne diuturnitate ac sævitiâ dolorum attritus mollior  
animo



animo succumberet. Magni semper æstimaveram,  
A. *honoratissimi*, MEIBOMIUM, cujus conversatione  
summâ cum jucunditate fruebar: cum vero extrema  
imminerent, tum solitô mihi augustior visus, quod  
animus corporis incuriosus, & jam liber, nil popu-  
lare, nil vile aut abiectum versaret, aut proponeret:  
pauca, sed significantissima, & plena sapientia loque-  
batur, quæ sublimitatem cogitationum testarentur,  
&, digna perpetuò meminisse, adstantium animos  
non leviter afficerent & moverent.

Quantâ vero constantiâ capitalem hostem op-  
periebatur! non illum lachrymæ conjugis aut libe-  
rorum, non aliæ graves causæ ad desideria retinen-  
dæ vitæ provocare aut invitare poterant: quin po-  
tius serio illos monebat, exuerent animo tristitiam,  
nec se nihil profuturis lachrymis ac ærumnis mace-  
rarent: hanc esse naturæ legem, ut, quod natum sit,  
aliquando moriatur: non semel eorum planctus  
exaudivisse Divinam Majestatem, atq; morti vici-  
num restituisse in integrum: percipere se jam cæle-  
stis voluntatis decretum: quô mori juberetur; idq;  
se facturum animo composito atq; obœdientissi-  
mo: malum enim esse militem, qui Imperatorem  
suum gemens atq; invitus sequatur.

H 2

Hinc



Hinc, abdicatâ omni curâ rerum caducarum,  
& supremâ salute Uxori, liberis generisq; porrectâ  
singulis manu, nuntiâtâ, totus se vertit ad cælestium  
contemplationem, Deoq; gratias, quas poterat ani-  
mo concipere, maximas egit, pro ingentibus bene-  
ficiis, quibus se indignissimum totâ vitâ cumulatissi-  
me exaggerare voluisset: confessus gravissima deli-  
cta, quibus S.S. Majestatem totiens offendisset, con-  
fugiebat ad præsidium Divinæ gratiæ & misericor-  
diæ: suum ut hominis fuisse peccare, solius Dei jam  
fore, misereri: præterea Servatorem generis humani  
in ore, in oculis, in animo habebat, cujus sanguine  
innumera delicta sua expiari precabatur: quem  
etiam voce, vultu, gestibus anxie desiderabat, quasi  
præsentem extensis brachiis totiens amplexurus.

Placet novissima verba, quibus eum compel-  
landum duxi, cum jam fatalis hora instaret, & mori  
certus esset noster, ni grave ac molestum vobis  
fuerit, referre. Sursum corda ad Dominum Deum  
Ecclesia levare jubet: sursum & te vocant initia tua  
Excell:<sup>mi</sup> MEIBOMI: nosti quantâ sollicitudine, studiô  
atq; industriâ in variarum rerum cognitione occu-  
patus hætenus fueris, quàmq; intellectus noster  
non in divinarum modò, sed & naturalium rerum  
& quæ ante pedes sunt, scientia caliget: namq;

*Mens*



*Mens cecis obruta membris  
Nequit, oppresso luminis igne,  
Rerum tenues noscere nexus.*

Imminere, dixi, illam corporis dissolutionem, quæ  
animum liberet atq; suæ spontis faciat: ut hic merito  
habeat, quod gratuletur sibi, cum emissus tenebris,  
in quibus volutatur, non tenui visu clara prospexit,  
sed totum diem admiserit, & redditus cælo suo  
fuerit. Exues, Amice, omnem infirmitatem, ne te  
præfocans sericopia totiens in posterum strangula-  
bit, ne te nelli atq; affecti corporis artus crudelis  
ille tortor, ingens dolor, amplius cruciabit. Nosti,  
Vir Excell.<sup>me</sup>, beatitudinem summumq; bonum in  
contemplatione rerum divinarum locasse sapien-  
tes: animus tuus non in cæli, siderum, aliarumq;  
scientiarum consideratione occupabitur, ut quæ  
infra dignitatem ejus jam, posita: sed relictis corpo-  
ris exuviis, radiatus luce divina aquilæ adinstar, quæ  
Solem intrepide tuetur, sanctissima cum veneratio-  
ne Divinam Majestatem contemplabitur; Deoq;  
similis, atq; intelligibili excellenti proposito se ipso  
inlustrior factus, & in contemplatione summi boni  
occupatus, Deum tibi, ac te Deo, uniet. Subjuxi ex  
Boethio,

H 3

Da

37



*Da Pater augustam menti conscendere sedem,  
Da fontem lustrare boni, da, luce reperta,  
In te conspicuos animi defigere visus:  
Disjice terrena nebulas & pondera molis,  
Atq; tuo splendore mica: tu namq; serenum,  
Tu requies tranquilla piis.*

O præclarum illum diem, quo ad illud divinum animorum concilium cœtumq; proficisceris, & ex hac turba & colluvione discedes, purissimis mentibus, sanctis Patriarchis, Regibus, Prophetis atq; Apostolis, tuisq; dilectissimis postliminiò redditus atq; intra sedem beatarum mentium receptus.

Hæc, aliaq; ex D. *Bernhardo* cum morituro in mentem revocarem, offendi eum non modo integrum rationis omniumq; sensuum dicta quæq; exactissime intelligere, sed & plenum jam Deo flagrare totum deliderio sempiternæ vitæ, satisfacere nature debito & exauctorari cupidū, atq; esse cum Christo. Nec vota Divini Viri inania fuere: paulon. post (cum mihi necessario abeundum esset, & actis gratiis amplissimis pro tot tantisq; in me collatis beneficiis, quorum memoriam non nisi cum vita deponam, Divinæ benignitati eum commendarem; ille verò infinitas redderet gratias, cuncta prospera à Deo precatus) XVI. Maji inter preces atq; lachrymas ad-



adstantium, placidè, quasi somno solutus, expiravit.

Passa profecto *A. Incluti* civitas nostra excessu  
MEIBOMII, summo ingenio exquisitaq; doctrina  
Medici & Philosophi, grave damnum: cum, ut loque-  
batur medicinæ Parens, *οὐ τοὺς πύργους, οὐ δὲ τὰ τείχεα, ἀλλὰ τῶν*  
*σοφῶν ἀνδρῶν σοφὰς γνώμας* robora atq; decora esse rerum  
publicarum sciamus, & quod parem forsan nun-  
quam, vix secundum ab eo, habituri simus medi-  
cum. Quis enim omnes & singulas animi exquisi-  
tas dotes ipsasq; virtutes in plenâ adeo possessione  
habuit, ut adornando ejus ingenio simul conjurasse  
aut contendisse videantur? MEIBOMIUS.

Quis in ipso domicilio ac gremio Musarum  
natus & educatus non unum Apollinem, sed plures  
fama atq; eruditione Clar.<sup>mo</sup> Magistros habuit, &  
puer egregiis documentis editis tantam spem de se  
excitavit? MEIBOMIUS.

Quis tanto conatu tota vita studiis operatus,  
ut ne quidem noctem solidam quieti concederet,  
nec ardor discendi in senectute remitteret, omnem  
omnium disciplinarum cognitionem animo suo  
complexus? MEIBOMIUS.

Quis tantis obrutus laboribus exquisita, rara &  
egregia ingenii monumenta æternum duratura  
literis consignavit? MEIBOMIUS.

Adeo

32



Adeo non æmulandi sed imitandi sui inlustre  
exemplum nobis posterisq; propositum reliquit  
MEIBOMIUS.

Ipsa afflictissima vidua & mæstissimi liberi ac  
generi perculsi acerbissimo casu mortem charissimi  
Conjugis, suavissimi Parentis & Soceri insolabiter  
lugent, & vestro paterno affectui, Proceres Reipubli-  
cæ Amplissimi, sole uni more, maximopere se com-  
mendant. Meminerint vero hi, casum istum huma-  
num esse, nihilq; sine cælesti dispensatione fieri: atq;  
optimum esse, pati, quod emendare non possumus,  
& Deum, quo authore cuncta eveniunt sine, mur-  
muratione comitari: præterea Deum usuram nobis  
vitæ dedisse, tanquam pecuniæ, nulla præfinita die,  
nec habitandi sed commorandi diversorium nobis  
esse concessum: ex quo serius, ocius, arbitrio divino  
evocamur, fataq; properantur nec opinaturis:  
quemadmodum politum illud ac nobile virtutum  
sui sexus exemplar, *Catharina Brandes*, Clar.<sup>mis</sup> ma-  
joribus genita, tua, Ampl.<sup>me</sup> Dn. *Roddi*, nurus lectissi-  
ma, primipara, & in amœnissimæ ætatis flore extin-  
cta, tumultu gentilitio hodie inferetur. Quin potius  
grato agnoscant animo, nostrum non modò publi-  
co, sed & privato suorum egregio, tam diu superstite  
fuisse,



fuisse, & confecto curriculo vitæ, quod suavissimo Collegæ suo, *Hermannovestbovio*, non ita pridem evenisse vidit, metæ propiorem exanimatum.

In primis vero cogitent, Venerandum Senem ob crebram invaletudinem sibi ipsi gravem (quem paucorum annorum accessio nil juvare potuisset,) liberum jam omni malo speculari cum admiratione & ineffabili gaudio cælestis gloriæ splendorem:

Nos vero, *A. Incluti*, magni hujus & eximii Viri memoriam sic veneremur, ut omnia dicta ac facta ejus animo sedulo versemus, famamq; & figuram animi magis quàm corporis complectamur: non, quod intercedere velim epitaphiis honoribus ac monumentis, quæ ligno, ære aut marmore finguntur: sed ut vultus hominum mortalis, ita & simulachra vultus caduca & suo tempore peritura, forma mentis cælestis & æterna, quam tenere & exprimere nulla arte aut materia, solâ defuncti virtutum imitatione, liceat.

Quidquid gratum & decorum in *MEIBOMIO* amavimus, quidquid singulare & egregium in ingenti Viro mirati sumus, hæret adhuc, mansurumq; est, in animis hominum, famâ rerum, æternitate temporum.

D I X I  
I

33  
DN.



EPICEDIUM  
VIRO AMPLISSIMO ATQUE EXCELLENTISSIMO,  
DN.D. JOANNI HENRICO  
MEIBOMIO,

Medico nostri seculi Inlustri

Archiatro Lubecensium incomparabili,  
Amico desideratissimo & sine pari,

*XXII. Maji solenni funere elato,*

In publicò literatorum omniumq; bonorum  
maerore,

*Lugens scribebam*

Paulus Neufrañz / Phil: & Med: D.

**N**Estor ad hoc carmen me invitam arcesse-  
re mentem,  
Invito calamo presentes scribere versus;  
Sic oculos lacrumæ fœdant, sic pectora  
planctus

Occupat, & densâ luctus caligine tristis  
Mens hebet, attonitum cerebri mirata stuporem.

Maxime MEIBOMI, decus immortale cohortis  
Paonia (cui cuncta sui secreta theatri  
Credidit, Hygeiamq; dedit disponere nutu  
Phœbus, & Hybleo paverunt melle tenellum

Infan-



Infantem, letæ circum cunabula, Musæ,  
Ipse etiam Charites blandum risere jacenti,) 2  
Quod ruis, & thalami lectissima pignora casti,  
Conjugii & fidam sociam, haud miserate relinquis?  
Incluta nec virtus, nec maxima fama per orbem  
Sparsa tibi possunt properam tardare senectam?  
Nec studii remoratur amor, nec multa tuorum  
Ægrorumve tuæ succurrit gratia morti?  
Nec quicquam conferre potest medicina salutis?  
Non, si vel totis querantur pharmaca thecis.

Visum aliter Domino, qui jussa capeffere fortes,  
Mandatis parere suis jubet Induperator;  
Cujus & imperium generosa mente secutus:  
Hic tibi jam requiem post tot tantosq; labores,  
Et pacem eternam post acta pericula donat.

Indultum studiis satis est mæstisq; querelis  
Ægrorum, queis sæpe dies te impendere totos,  
Sæpe etiam memini vigilas ducere noctes,  
Immersum studiis teneras disperdere vires,  
Anxium & ægrorum capiti non parcere caro.  
Sursum te tua vota vocant, magnusq; Brabeutes  
Emerito tribuit dignam pietate coronam,  
Sanguineis undis CHRISTI meritôq; redemptam,  
Cujus in amplexus vivens moriensq; ruebas.

1 2

Salve

34



*Salve magna anima, in paucis dilecta JEHOVÆ,  
MEIBOMI salve, decus excelsum addite celo!  
Namq; tua in terris ut posthuma fama coruscat;  
Sic superos inter radias velut ætherius Sol.*

**H**Æc maximi & eximii Viri honori atq; memoriæ consignare  
volui: quæ sequuntur epicedia, post funerationem ab Ami-  
cis ex Academiâ Juliâ tramissa, legi dignissima, & plena deside-  
rii MEIBOMIUM versus, coronidis loco subjiuntur.

**E**Rgo nec ingenio nec famæ sæva pepercit  
Vis mortis, dum Te rapuit celeberrime Doctor  
MEIBOMI, mihi quem primis conjunxit ab annis  
Suavis amicitia & sinceri foedus amoris,  
Quum Tuum apud Patrem, quem gloria magna vehebat  
Propter & Historiam & mirandi carminis artem,  
Comparibus ducti studiis ageremus uterque  
Majori mihi tunc præcedere contigit: at nunc  
Præcedis quamvis natu minor. O mihi si se  
Sic hodie, ut quondam, præberet Musa benignam,  
Qualis erat, quum nos florens conjungeret ætas,  
Quantis carminibus celebrarem singula vitæ  
Gesta Tuæ, dotesq; animi atq; insignia cuncta,  
Quæ Te plerisque mortalibus antetulerunt.  
Nunc friget senium, & facit ut sit frigida Musa,  
Tantisq; ut cuperem, cantandis laudibus impar.  
Præcessisti ô amice; sequar Te quando vocarit  
Qui maria & terras, qui cælum ac astra gubernat,  
Quiq; habet in manibus nostras vitasq; animasq;.

*Georgius Calixtus D.*

*Helm.*





Elmstadij natus Musas Meibomius inter,  
Postquam etiam Italicas & quas celeberrima  
Roma

Nutrit, adiisset, Domino adspirante reversus  
Ad patrias, Phœbi ipsam hanc, ex quâ prodiit, arcem.  
Sic illustravit, sic ornavitq; coronam  
Illam Doctorum, quibus inclyta Julia gaudet,  
Ut sibi splendidius jubar haut optaverit unquam.  
At postquam frenos furiis laxare Gradivus  
Cœpit, & innocuas ævus Mars pellere Musas,  
In magnâ & clarâ Lubecâ substitit urbe,  
Non tamen his potuit quasi limitibus cohiberi  
Magnifama viri, sed vastum erupit in orbem.  
Et quamvis nulli docilis mors parcere doti  
Falce suâ eximium demessuit improba florem,  
Attamen haut poterunt tumulo condi aut sepeliri.  
Ingenii fœtus, candor, labor impiger, ardens  
Cœlitum amor, quem vitæ est integritas comitata.  
Non lugere quidem nequit hunc tantum sibi ademptum  
Urbs ingens Lubeca virum, non cultior orbis  
Doctorumq; chorus, quondam hoc adamante superbus.  
Mœsta gemit Conjux, carissima pignora plangunt.  
Nemo tamen velit in miseram revocare beatum  
Hanc mundi scenam, vel dissuadere quietem,  
Quam solidam nunc largitur manus Omnipotentis. 35

I 3

Tumba



*Tumba tegit corpus, sed vivit fama superstes  
Non unquam moritura, & spiritus arce receptus  
Æthereâ ante Deum celesti pace potitur.*

Frid. Ulricus Calixtus  
S. Theol. D. & in Acad. Juliâ  
Professor.

**E**st locus, augustas ubi Princeps Guelficus olim  
Musis aptavit restituitq; domos:  
Ille Poetarum specimen prægrande fovebat  
Phoebejo plenum numine, MEIBOMIUM;  
Ille cothurnatum genuitq; Machaona, cujus  
Antea non vidit Teutonis ora parem,  
MEIBOMIUM, mirata fuit quem Oenotria tellus,  
Quem stupuit doctis Gallia clara viris,  
Ereptum furiis belli imperiale recepit  
Lubecum, Codani fama decusq; sinus.  
Nunc utrumq; feri tulit inclementia fati,  
Subduxitq; oculis, Munde maligne tuis,  
Attamen haut orbi subtracta est enthea virtus:  
Virtus sola mori nescia sola manet!

*In memoriam Dn. Affinis  
olim desideratissimi  
apponebas*

Henricus Hahn D.

Epita-

18



# Epitaphium.

**P**hoebi sacerdos; Æsculapii lumen:  
Pullus Minervæ: Corculum Camænarum;  
Cui pectus ipsæ Gratiæ poliverunt;  
Lybeca viros plurimos cui debet:  
Ab eruditis Ille sic celebratus,  
Tot monumentis ingeni datis luci:  
Ille & meorum ingens amicus (heu!) quondam:  
Docti parentis filius magis doctus,  
MEIBOMIUS nostras JANUS HENRICUS,  
Animo reposto sedibus beatorum,  
Isthoc sepulcro membra condier jussit.  
HAVE VIATOR, exprimens vel exemplum,  
Vitam perennem comprecansq; defuncto.

Memoriæ V. G. & amici longe carissimi  
F. Helmeftadii

HERMAN. CONRIGIUS. D.

S.R.M. Sued. & Illustriss. Ostfrisior.  
Principis Consiliar. & in Acad.  
Juliâ P. P.

ΕΠΙ-

36  
=



## ΕΠΙΤΑΦΙΟΝ.

**U**lia quem genuit, fovit mirata Lybeca,  
Conditus hoc recubo marmore MEIBOMIUS,  
Nullum me latuit sapientum dogma virorum.  
Pæonia nullis artē secundus eram.  
Arcanum quicquid sacro & velamine tectum  
Grajugenæ jactant, quicquid & Ausonii,  
Nec non & gessere mei quæ Saxones olim,  
Perspecta ingenio cuncta fuere mihi.  
Per me cognoscit veri studiosa juvenus,  
Quod Jusjurandum dixerit Hippocrates,  
Per me Mæcenas toto jam claret in orbe.  
Heroum per me prælia Rosla canit.  
Jamque Machaoniæ Vitas describere gentis  
Urgebat seræ posteritatis amor.  
Interrupit opus mors invida. Sat tamen ingens  
Nomen & æterna est gloria parta mihi.  
Debetur terræ quicquid mortale creatum est;  
Enthea sed virtus interiisse nequit.

*Memoria*

*Cl. & desideratissimi Viri*

*L. M. Q. Ponob. in Acad. Juliâ*

Valentinus Henricus Voglerus  
Phil. & Med. D. hujusq; P. P.

••••• (n) •••••



ONTI  
ORUM

gleru  
P.P.







KONSERVIERT DURCH  
ÖSTERREICHISCHE FLORENZHILFE  
WIEN 1967

005644206